

丁巳孟夏印

非賣品

古梅書屋遺稿

涇城李益昌題

刊行緣起

府君以前清己丑孝廉戊戌大挑二等授教職會政變不之任卽於辛亥應徐匯公學之聘擔任修院及公學教習之職課餘之暇耽於吟咏喜怒哀樂一寄於詩顧多散佚不自收拾檢諸篋中僅得二百數十首不孝等於府君生時未能榮養歿後又無以顯親揚名深滋慚悚爰集其遺稿付諸剞劂以昭示後世焉

子
楊我
鑄煥潤
謹啓

古梅書屋遺稿 刊行緣起



傳

先生諱振錄字偉才一字味吟江蘇上海人也祖秋巖仁厚敏達精篆刻尤工繪事父事修歆歆行善有聞於時生五子先生其冢嗣也早失恃祖妣王太夫人特鍾愛之幼卽岐嶷廣穎豐下穎悟異常兒八歲解聲病讀唐人詩琅琅上口十歲始學爲詩逾年師出聯語令對曰簾深上燈早卽應聲曰風定落花遲師激賞之又曰深樹雲來鳥不知對曰空園露滴蟬先覺師擊節不已由是深器之以爲苟日進不懈取青紫如拾芥耳上海爲人文薈萃之區俊彥如林濟濟霞蔚切劘攻錯麗澤攸資是時勝流如童心田汪吟如趙鏡芙楊東山諸先生皆少年髦士志氣如雲與先生結社聯吟極友朋倡醺之樂而先生之季父愛棠先生與耀珊先生復親督課綦嚴於是先生之學業大進其於有司之尺度固已徹於心而調於手矣年十九庚辰入邑庠己丑恩科登鄉薦時年二十有八也明年庚寅應禮部試不售戊戌再上春官又不第闈後大挑二等授教職未及銓選而政局變先生遂項項然無意進取家居教授者十有二年辛亥以金文宇先生介紹就館於徐匯公學初任大修院教習繼兼公學中學教習主賓融洽能勤

其職學者稱良師焉先生天性醇粹喜怒不形與人言暖暖姝姝若恐傷之而尙論古今大義所在絲毫不容假借好吟咏終日不出戶庭布袍方巾蟄處一室當其冥思孤往有感於懷則發篋出唐賢詩高誦之興酣氣盛聲震戶牖時或蕭然有會縱筆疾書宮商既諧躊躇滿志大圈密點惘然自謂不減古人以故所居之室環堵皆零箋斷簡塗附幾遍風至淅淅有聲廝養或嘲之曰是徒疥壁亦安足貴則笑而答曰吾以自娛也其風趣如此顧先生少席豐厚晚年則際遇甚窘壬子有黃門之悼丙辰四五兩公子又相繼早世人徒見先生夷猶瀝脫而不知其重有憂也遂於閏二月初四日嬰疾延至三月十二日卒於家年五十有六祖妣王太夫人清陝西布政使王承基胞妹妣解氏娶王氏祖妣王太夫人胞姪孫女先六年歿生六子曰我潤業儒娶張氏曰我煥邑庠生娶王氏曰我鑫曰我鏞均未娶曰我奎曰我柑皆已故孫男四人孫女五人所著有古梅書屋遺稿行世初先生於天主教理心甚欽佩志切皈依同事蔡蔚塘宋棟臣兩先生乘機勸導之迺於病中受聖洗禮此可見先生信道之篤而見義勇爲矣余忝爲先生弟子我煥以先生行狀來屬爲傳余自愧不文安足以傳先生旣不獲辭爰

將其生平制行待人之事拉雜書之俾世立言之君子有所采擇云爾
中華民國六年仲夏受業金經書賜伯謹誌

古梅書屋遺稿傳



序

文人多厄自古已然豈造物忌才而故困斯人哉蓋所以玉成其道德之功也海上楊味吟先生能文章而蓄道德者也前清光緒己丑舉於鄉予嘗讀其中作才氣橫溢思想奇特不落尋常數墨家言不禁爲之心折曰此棘闈鑒戰中獨樹一幟者宜其捷也乃忽忽於今二十有八年而先生卒未以文章顯方歎世無伯樂驥不免有伏櫪之悲也前四載應徐匯公學聘來授中四班予與同事始識先生吐屬蘊藉意氣和平望而知爲道德中人相見恨晚觀其所改課本折矩周規一遵理法與當日之闡文絕不相類殆以課徒之不同應舉歟抑以磨鍊而歸於純粹歟更於沈君公布案頭獲讀詩稿強半悼亡之作琢句工整無半騷氣其胸襟曠達不同流俗有如此方謂老成在望常爲後學典型不圖於夏時上已後九日遽歸道山惜哉今哲嗣文青睠懷手澤將所遺詩稿付梓以廣流傳問序於予予不文又不善詩惡能道先生之萬一惟以先生之有道德而不徒以詩文見也述其厓略如左是爲序

中華民國六年仲夏杭縣鑒林王棟謹序

古梅書屋遺稿 序



序

士生於世懷抱瑰異不獲以事業勳名表襮天下惟恐沒世一無所稱至欲區區盡力於文字窮矣顧失於彼而償於此猶可以自慰乃又困陋窮蹙終不得遂其志卒也沒世而後寂寂無聞與草木同腐焉嗚呼予是以歎古之魁儒碩彥往往湮沒而不彰者何可勝道其文辭所由不少概見歟卽其偶有寄托之作咏吟之篇幸而得之困陋窮蹙之中然其磅礴鬱積之氣蘊於中而未發者尙數十百於此焉此尤可悲者也海上楊味吟先生工文章耽吟咏以才氣自負早歲登鄉薦躋於禮闈再戰不勝少席豐厚自家中落後死喪憂患相逼而來益鬱鬱不自聊迨應匯學之聘任教授課務煩劇而以詩文來請業者復趾錯於戶口講筆削旣夕無暇晷余忝與先生共事嘗訪其所居之室則見屋壁戶牖題詩皆滿竊怪先生於艱難辛苦之中有此餘興自嘆以爲不及今年春先生歸道山後哲嗣文青稟集其所爲詩僅得若干首彙爲一編泫然謂余曰先人手澤祇此而已余受而讀之益爲先生悲也夫以先生之才之學奮翮雲路翔步天衢拖青紫登廟堂直意中事耳而天竟阨之又使假以清閒之歲月俾無人事之

牽率得專其力於著述鴻篇鉅製蔚爲偉觀亦盛事也而天又阨之遂使先生之才之學他無所見而僅見於是編夫先生之才之學豈以是編限哉然卒限於是乃歎天之所以阨先生者至酷又以知後之讀先生詩者未嘗不悲其遇不獨余一人而已也先生已矣不才如余兩鬢飄蕭自傷老大生平事業百無一成徒以憂患餘生爲人作嫁顧影汲汲墨黯管枯正恐百年而後欲求如先生之殘編斷稿流落人間者殆不可得然則余自悲之不暇而又何暇爲先生悲哉先生有知以余言爲然乎否也

中華民國六年夏時四月中浣茸城鏡如蔣誠禮謹序

題詞

吳興沈慶璿

超超元箸韻偏長佳句何曾遜晚唐馬帳風高扶大雅龍門望重戀斜陽匯濱桃李都
沾澤海上文星忽掩光今日九原可無恨連翩雛鳳繼芸香

崇明蔡蔚塘

殘墨依然留四壁高人已向白雲翔嵇康別後琴無韻董子來時座有香自幸三生親
杖履那堪一世等滄桑若教重過日暉路滿目松楸更可傷

受業施步階

嘔完長吉好心肝留作人間拱壁看南國句會傳沉芷東山操憶賦猗蘭總因涉世途
多仄愈覺傷懷淚不乾展誦遺編增悵觸斜陽猶戀舊蘭干

受業沈開誠

春風無賴落花天況值黃楊厄閏年先生病於閏二月鶴醒十洲瑤島夢聲淒五夜壁琴絃招魂

難返紅塵外問字還疑絳帳前一曲猗蘭成絕調幾回讀罷淚潸然

受業沈欽造

不羨功名不羨仙，苦吟終日聳詩肩。七年得侍春風座，四壁還黏蜀錦箋。燈下論文飛玉屑，酒邊覓句似雷顛。那堪撰杖成陳跡，回首前塵一泫然。

病入膏肓早自知，無端感慨鬢毛衰。春蘭人去香銷歇，夏屋詩成讖信疑。先生病中作有熱血腔中少維摩與欲開底寒與夏屋伴病有春蘭之句大化漫嗟羊熟胛，遺編空學豹留皮。從今應召修文去，無復風和絳帳時。

受業沈光造

（滿江紅）往事思量會忝，奉關西講席兩世追陪。情契洽，心盟金石，薦地風波來不測。一霎間，山頽木折，聽到凶消息，斷迴腸淚盈臆。織錦霞易消歇，金鏡月易殘缺，祇文墨留存千秋不滅。遺稿刊行垂紀念，編詩史哀然成帙。莫輕看斷簡與殘篇，都心血。

古梅書屋遺稿

上海味吟氏楊振錄箸

鹽城印鸞章韻雪校刊

己酉年

弔劉碧環

或作碧霞乾隆時蘇撫某之寢室以才貌獲寵遇讒枉死即瘞署中來鶴樓牆下後數十年於來鶴樓降乩與諸名士唱和乃得遷其遺魄葬於虎邱真娘墓左近

幽豔才華本是仙玉環羽化幾何年牆陰一角花魂靜樓上三更月魄圓洛浦鴻驚親訴苦蓬萊鶴返獨逢緣虎邱山下真娘墓旁泐貞珉尙宛然

前詩作於清明黃昏微雨時至夏五又於無意中得其畫象真真欲喚楚楚堪憐因有所感再題一絕

文字因緣非偶然才情慕重百年前關心一幅崔微畫勝似丰神月夢傳

某名士既葬碧環乃得於夢中

一見顏色月下美人珊珊來遲接詞既畢旋即謝去

暑夜乘涼

藤蘿掩映粉垣東暑退重樓夜露濛星目閃光千里電晶窗弄影一燈風懷開隔院清談裏涼逗疏闌亞字中駕侶於今居樂地莫教河鼓怨牆紅

庚戌年

過外舅故館 作於古硯齋

華屋依然在機雲去卅年
晶窗明落日塵架理殘編

隨園詩話有賀新婚詩而限階乖骸埋四字爲韻者試戲和之作於桂堂東

十五王昌嫁盈盈上玉階
笙簫音並奏琴瑟性無乖
吉兆蘭徵夢新妝粉作骸
巫山峯十二雲影可相埋

辛亥年

擬杜工部月夜憶鄜州五律三首

鄜州今夜月照見素娥心
兒女燈前話關河夢裏深
清霜雲鬢上白露襪羅侵
雙照知何夕瑤琴佇好音

今夜都門月鄜州一樣看
閨情和夢遠人影倚闌寒
玉露爭蟾皎銀河駕鵲難
幾時雙照夕兒女慶團圓

我憶鄜州夜鄜州憶我時
舉頭同見月對鏡數歸期
銀漢紅牆隔羅襟白露滋
劇憐兒

女小不敢說相思

三月上巳後九日散步於堂後園林口占七律

一卷香山集罷翻斜陽影裏步林園蕭疏竹葉青條細穠艷荊花紫蕊繁晴宇半冥蟾
漸朗風枝同宿鳥猶喧小桃側立斜柯疊樊素橫釵夕不言

是夕又占七絕二首

夜色半園輝皓月春樓一角點疎星高枝宿鳥無聲息草木清華花露零
翡翠天高懸玉鏡琉璃窗遠見紅燈園林似水花如錦秉燭宵遊得未曾

送春詩

幸得辛年是閏年一星期緩送春天
是年因夏六月有閏土半年節
氣較晚故四月初八日方立夏依然戀戀花辭樹那更
萋萋草滿阡別緒深逾桃岸水新陰潤透綺琴絃曉鐘未動休推酒風送驪歌最可憐

北樓晨起卽景

朝陽在高樹樓臺開畫圖鐘聲清不極雲影淡將無久雨晴逾喜涼秋興未孤晨興啓
窗牖林露溼模糊

園丁贈菊

煙簑兩笠老園丁送我幽香菊一瓶爲道先生多冷豔北樓靜對兩忘形

感懷

卅載青衫落拓中春明兩度走東風退之憔悴書空上阮籍清狂路易窮此日雙棲飄
鶴髮當年一夢冷蟾宮渡頭苜蓿秋來盡落日孤城戰火紅

時漢口南北交兵未已故云

壬子年

春初卽景

晴日晶窗暖春風絳帳和雲間人意懶林密鳥聲多生氣噓枯柳光陰擲疾梭元宵兼
上巳那得不顏酡

陽歷上巳適逢陰歷之元宵亦民國建元佳話也

上巳日散步園林口占七律

生香不斷四時花三月韶光分外賒到眼日華迷五色得天文字燦千葩園林處處啼
春鳥亭榭年年映曉霞去歲小桃今豔甚阿蠻舞罷漾裙紗

感懷 作於古硯齋

萬古興亡事從頭說倍長乾坤同一夢戰伐笑千場朝代猶如此身家更自傷孟梁相對處白髮兩成霜

弔龔芝麓尙書

千古興亡事可悲元明過去又清時玄黃罷戰生降日粉黛從軍惜別詩公雖降清而有復明之志橫波尤尙俠義當鄭成功兵入長江時夫人以私財助軍欲合舟山阮進以應之且身在軍中公於其從軍作七律八首以送其別世上應無溝瀆管閣東重聽履聲危用元臣降明之危素典絳雲樓角三層火恨不移燒北國師

初夏北樓卽景 仿韋蘇州體

柳外一聲雷涼夢騷人醒大雨西天傾狂風北閣冷向晚明霽色返照鐘樓影呼燈誦古詩月上青松頂

人靜吟哦罷捲幔晶窗下燈指土山彎月窺松樹罅雲霄夏屋蟲樓臺春星帶東園竊陰陰衆綠露如瀉睡起挑殘缸徘徊風景夜

漫興

薰風送暖入窗紗長晝鶯啼薄暮鴉紅雨無痕春久去綠陰如幄日初斜龍爭大地風

雲緊鳳住名山歲月賒天上人間來往便電光奕奕駕飛車

送四川尹昌衡大都督出征西藏歌作於古硯齋中

穆如清風尹吉甫投袂奮興西破虜萬人一心鐵石堅岳岳軍節制何能挫天竺之北藏
衛連索倫勁旅征當年一朝清德衰何極番人競亂紛如煙桓桓都督今人傑伯言公
瑾差堪匹姜維深得羌人心諸葛全收衆謀力翻翻大纛出西征馬似游龍鎗似林萬
里行師過枕席千山扼要駐麾旌七禽七縱攻心策菩薩低眉迎漢節佇看西塞靖風
塵不用機關炮流血

悼從子聘婦徐女士翥雲

自繫朱絲十二年何如一見竟無緣璇閨書寄催鴻雁巫峽歸遲泣杜鵑楊柳曉風殘
月夢杏林春雨落花天小星一角銀河映莫再人間訪麗娟

代內悼妹裕功女士

自來彩鳳不知鷗鷺在朱門閨闔家攘攘青蠅空有鬧瑩瑩白璧總無瑕清宵噩夢鵲
啼月落日閒墮人殯花小阮未婚孤妹在斷魂何處返天涯

梅太君古稀上壽歌卽呈次公子問羹孝廉

再春先生吾父執一生精力瘁公益伉儷時聞敬姜敬總角知慕德曜德皇天眼明鍾毓奇三株玉樹臨風立牡丹開晚始稱王青梅成陰聯結實幼幼矧分仙掌甘枝枝濃培庾嶺澤一從先生去作古勞勞慈母心彌苦長君闢達未竟才次郎翔步蟾宮路季子才調亦不羣向平了願安儒素七十年來馳驅輪古稀矍鑠尤精神曰期曰頤固其所多福多壽非異人坐看庭木桐孫長那見霜華鬢角新北堂萱茂蔭常在含飴點首許筵陳彩衣幾隊堂階燦壽客上壽香盈蓋天風激灑菊花盃盛似當年鹿鳴宴鰥生出門爲飢驅授粲適館匯水隅星期歸覩徵吟東悔未躬隨萊子庭前趨因君常奉慈顏笑令吾且妬且羨思哺鳥政體雖改孝不改孝廉之孝君有吾獨無兩家世誼交深厚室入芝蘭飲醇酒析薪弗荷吾自醜貧無長物堪獻壽惟有三百燕詞上王母權作幾顆蟠桃大於斗

仲冬天氣嚴寒三兒送新裘至視之天青寧綢表也余以悼亡纔過一月不忍衣於外乃效詩人尙裘之法焉因賦七古一篇

欲平未平男女權愈久愈重夫妻情使我先卿有不諱麻衣如雪卿終身今卿先向蓬山返予忍衣裳安吉換影服承歡爲子心故劍多情夢砧念新衣豈是桓郎嗔與子同衾三十春卿今朝衣眠橫陳予淚昕宵滴滿巾聊將尙瑟學詩人不忍彩繪鰥魚鱗

冬至後六日大雪

一夕地都白連朝天不青森森惟屋頂寂寂掩窗櫺樹直春藏柅雲多月滿庭老梅何

處覓凍淚落星

時賦悼亡未滿一月故末兩句云云

悼嘆 臘月二十日遇內妹玉崑氏時玉崑已婦居十有七年矣

半生半死同林鳥孤影孤燈獨夜人若與玉崑相比例鰥魚我亦未亡身

癸丑年

先祖秋巖太府君有冊頁小照兩紙一係少年時一係中年所繪與晚歲病中所描清瘦遺像迥異幼時曾展此照庶祖妣李安人見而泣下曰此照極肖當時容貌錄乃珍藏至今溯吾祖繪照時當在八九十年前今因翻建公之遺宅權遷出外檢理各物重展斯照胸有悵觸爰恭誌一律

雛孫髻鬢欲如銀大父重瞻少壯辰畫似壺中顏可駐寒銷梅裏趣常新斗篷耀月花
爲伴狐貉披香雪滿身預兆竹苞延世澤重椿蔭萬六千春

集唐人成句一絕

今年新春五日館中諸友皆歸家度歲未返北樓五楹祇有予一人獨居不去
寥寥靜夜寂寂寒窗隻影孤燈之下追悼故劍並以自傷斯時斯景想燕子樓
中之關盼其淒涼亦不是過也

擘破雲鬟金鳳凰一生贏得是淒涼無情有恨何人見樓上殘燈伴曉霜

元夜悲歌

三十年前好燈月梅花陌上開時節多情泰水惜青春歸寧莫負團圓夕二十年前桂
枝折佳期翻與嫦娥別元宵茅店下關霜下簾羞見江天璧主人逆旅兩鴛鴦額誦唐
詩情興長燈燭輝煌香馥郁不勝離緒動情腸今年身在城西匯又逢令節團圓會連
朝風雨暗沉沉一夕月光明靄靄北窗憑闌望中浦碧天如水無雲霧獨惜嫦娥已仙
去空留遺蛻鈎斜路指點隣牆西北燈明星三顆紅含情回頭埋玉東南地獨望遙天

三里晴月露滿林春臥冷司空虛墮伴佳人側身四望家何處輾轉空庭揖草青

殘雪

暈枕低徊雪一團曉風楊柳月同殘白肥易化淩波去素質終教住世難東閣早梅收
剝落南檐夜景淚闌干楊環不作王嬌死似玉如花莫再看

春風至

孟春十有一日東風解凍望樓北戍所五色國徽鎮日向西飄漾及午晴日烘窗突有一蜂入我書帷驅之嚶嚶弗遠去哺後散步園林間觀風景遂得次聯迨回北閣夕照未墜反影入窗

因命不律
足成一詩

鎮日旂西漾東風不暫停一朝春忽至千樹夢都醒匯水流三折梅花落半庭玉鉤斜

畔路應見草回青

時閨人已葬於日暉
港側故未聯云云

花朝日在王親家第觀前庭所植花草卽弔佑之親翁時佑之親翁亡已旬餘矣

碧樹逢春欲放芽種花人已隔天涯前庭芳草年年發去路神魂渺渺賒綠野依然開
府第丹爐何處問仙家益籤芍藥遺題在雨雨風風字跡斜

內子十五歲曾有依母玉照一紙予聞而索得之留於東閣者兩月餘並有詩云
較昔初逢覆額時至今十倍益豐姿總因少女多顏色不待催妝預作詩今閱

時三十有六年矣此照留存次兒處而攝影歲久未免褪色今年仲春夜坐北樓靜念及此爰賦二絕

當年省識畫圖中三五花枝膝下逢每到黃昏人定後明燈神往對牆東
山邱今日竟長眠一瞑無言下九泉卅載銷魂多少夢百宵離恨奈何天

二月十八夜休沐家中三鼓既敲獨自挑燈入內冀有所聞見爰周歷影堂及亡室舊寢停燭久坐均毫無聲息回至堂樓樓窗洞開是夕月缺未多而陰霧朦朧非雲非煙籠罩高空月華無色慘淡如夢平生所見之景未有淒涼於此者也迺下梯歸寢而口占二絕

夜靜攜燈坐影堂眞眞不下獨焚香更教拾級空樓上人去淒涼物亦亡
羅襪成單鳥不雙惟存飲藥舊時缸回身悄倚南樓檻如夢蟾光照啓窗

無題用雨般秋雨霖霖韻

弱水三千路不通香寒斗帳歇春風更無鏡裏山呈黛只有天邊月掛弓六出飛花終
礙菊雙行儀樹在扶桐紗窗不閉沈沈夜薄霧籠樓似夢中

獨夜纏綿獨自癡影堂獨對獨悲思嘔心長吉辭難盡久病肥環瘦不支鐵聚六州工
鑄錯雪堆霜鬢易成絲麻姑仙爪罡風折悔不金甌好護持

雪樣豐肌柳樣腰當年並坐奏秦簫清溪月下呼三妹佳偶城隅羨二喬菡萏南樓涼
露夜梅花東閣早春宵雙雙華燭妝臺燦自把名香被底燒

情天恨海易生魔清匯西流卽漢河鸞鏡塵封誰拂拭馬嵬襪隻孰收羅夜長無夢離
魂遠春平關心恨事多大地茫茫此終古那容橋鶻再填波

卅年春夢了無痕欲喚眞眞倩女魂留枕有情思洛浦扶筇何處訪崑崙沈沈地府終
同穴寂寂天台空掩門明月杏花知我否巫雲碧海悵黃昏

聯翩震巽惜坤勞漫說雛聲振九臯古聖亦知多子累上方不有斷情刀再迎碧玉情
稍慰重構華堂住可牢猶囑年年黃歇浦桃花春漲泛吳舫

寒潮五夜送仙槎一曲飛龍唱易差焦夢迷離涼北牖盆聲鳴咽泣南華鵲啼碧血驚
淒月草長紅心臥淺沙腸斷西城寒食路棠梨初放殯宮花

九京鄭重侍重姑浹髓淪肌話澤敷生壙陪卿卿可寂人寔留我我權通豆問小祭宵

同膳心字長焚夜滿爐一夕九迴腸寸斷祇傷永訣片言無

昔年三五正嬋娟省識春風畫裏禪下學心忙私室去上弦月數後頭圓東牆宋玉行
雲賦南國潘妃貼地蓮一萬可憐宵似夢短長難說此因緣

小玉新詞節奏和落霞掛席唱菱歌南方樓閣薰風早亞字闌干皓月多西子葬時符
噩夢太眞逝後冷香波春回水國生紅豆如此相思可奈何

悼內用王次回韻

曉風殘月一靈飄咫尺銀潢斷鵲橋身似夢魂連日醉淚流江海滿樓號先塋此日從
君去虛壙何年把我邀象服委蛇人不見綠波宿草夕寥寥

再詠二月十八夜情景

積塵窗啓夜無風羅襪飄零枕簟空明月亦知人慘淡非煙非霧罩朦朧
香奩無鏡但生埃蠹蝕殘編滿玉臺獨夜登樓尋舊夢芳魂何處不歸來

追悼

玉臺無鏡盡塵封白首蕭郎淚雨濃寫照但留垂死影蓋棺猶見帶歡容晶窗不閉三

更月紙帳惟聞獨夜鐘最是不堪回首處淒涼口澤飲殘鍾

春日雜慟

社肉歸遺少細君小樓春色過平分落紅帶雨胭脂淚新綠如雲翡翠裙流水一彎埋
玉地碧桃千樹護花墳杜鵑苦叫香魂返鎮日哀啼靜夜聞

丹鉛終日不曾閒忽忽書樓夕照間落盡寒梅空有淚灑將湘竹總成斑看花客地春
如夢聽雨孤燈影亦顰王謝堂中雙宿燕故巢失侶忍重還

雲英何處不歸來又見繁花陌上開細雨千絲春欲暮東風一枕夢初回青天碧海情
何極碎玉焚琴事可哀亞字欄干涼月在更無綈袂夜深偎

老梅雪裏悵分離春滿紅桃愈繫思花落廢城人去早月明清雁夢歸遲鴛鴦遇劫文
都減胡蝶無芳瘦不支祇有王嬌青冢近彎環三里隔漣漪

前題

每歲春歸告細君後園花放似紅裙今年雨淚雙如綫慟殺雲英去若雲
每對花前一慟君櫻桃豔李盡知聞垂珠微潤惺忪眼鎮日相陪淚雨紛

明妃青冢望非遙祇隔清溪白板橋著雨桃花歸逝水連天芳草護瓊瑤

自嘆時居宅將改建

燕子歸來問畫樑新樓乍起北堂荒屢廊板易消行跡月榭欄移怕悼亡肯構有人知
日暝遺釵抵債賴卿償祇嗟手似螳螂勁親搗雲英辟穀方

影堂

影堂靜夜叩湘靈環珮無聲跡杳冥一寸積塵盈繡戶雙枝殘燭映疏櫺嚴妝端坐如
初嫁病眼看人尙帶青一自分飛胡蝶後沈郎腰瘦似蜻蜓

影堂依倚當齊眉夜靜焚香卿可知底事寂寥無應響諒防聲息嚇情癡殘年淚點心
頭血齒臂盟言鬢上絲今夕不逢青鳥使教人何處訴相思

內大家女曾涉獵經書于歸後余授以妝樓摘艷衆女史近體詩輒成誦於是習
吟習楷可不勞而成不料冢子生後目疾久膺不能從事於詩書翰墨然性極
慧暇時往往倩人誦書而聽之入耳必會於心焉丁未歲次媳來歸余亦閒居
鮮俗務之紛擾內子欣欣然每倩予爲歌詠牡丹亭曲本一閱噫青燈紅豆歡

笑如新而黃土無情白頭人杳傷如之何今年春初予在匯上獨宿北樓夜望
後園依稀牡丹亭畔因思故內作二絕句以投匯江令流入日暉港墳河而達
焉

疏檐燈影三更火老樹枝丫數點星一樣情郎楊與柳此間可有牡丹亭
白頭地下可傷春影裏情郎畫裏人幸有匯江通一水雙魚三里達墳濱

隻影

隻影孤鴻雁終朝謀稻梁不憂冬日短祇恨夜年長故劍化龍去新鍼度鳳忙三眠又
三起我是漢宮楊

季春八日散步後園口占一律

年年花發儘思伊三度逢春客在茲桃李正當穠艷日燕鶯不斷曉昏時太真錦被初
慵睡素女冰容略點脂喚起臨風愁萬縷綿蠻聲裏雨如絲

是夕又賦夜景一律

星火遙看認里墟鐘樓高聳十尋餘浮雲迅疾隨風夜老樹槎枒放葉初朧月半規如

夢冷遠窗數點映燈疏尋詩獨步宵園裏清露微微暗襲裾

送春

嫩晴細雨送芳菲又見東皇命駕歸宮柳三眠人臥轍牆花萬點淚沾衣彩雲去路扶
桑遠落日空園祖道稀緩緩香車留陌上深山四月尙鶯飛

東風日日望南輶爭奈南薰未肯饒凡百綠陰都得意大千紅淚一齊澆醫花獨著成
春手疏草難陳展限條憔悴沈郎腰半把不堪重聽月明簫一作那堪良夜憶元宵

流鶯聲老隔牆枝樹底攜柑倦聽時夢裏因緣悲弄玉天邊鼓樂葬西施韶光九十終
離別世界三千盡旅羈自古東君原最達飄然還舉未僂辭

兼金贈

記得冰壺滌筆時廣寒宮裏折瓊枝而今賦手凌雲老猶見文心炙輶奇水月一輪超
性意芝蘭滿座碩人詩授餐適館兼金贈櫪驥猶堪千里期

無題

無裳何處不沾衣莫問人間舊是非阿堵傾將金穴盡沉疴誤煞玉環肥鵝兒管簫元

宵鬧鳳子詩書甚日飛搔首誰憐雙鬢短鏡中自訝黑全稀

馬上琵琶曲未終侍郎伏獵笑而公九天咳唾逢眸白十里馨香羨卉紅故國河山人
醉夢空樓風月景朦朧杏花憔悴楊枝瘦辜負天恩雨露融

曉日瞳矐井臼操夜深鍼指敢辭勞不妨蓬島逃千載怎使佳人泣二毛施焉曾依松
柏蔭醫花難得茯苓糕無城那有金吾禁幸得哥舒夕佩刀

婷婷嬈嬈女郎身一翦芳蘭一院春杜宇呼歸花姊妹相如空識藥君臣牡丹南國能
裁富桂子東山善饋貧祇嘆朝霞容易散謫仙不肯久紅塵

端節從師範教習兼小校國文總教習事因大閱暑假大考甲乙丙丁四班卷藏

事後口占二絕

甲乙諸生次第開善莪雖小樂栽培廣平檢點安仁閱桃李高低莫浪猜
過化存神老顧雍童蒙養正聖人功子雲目欲金篦刮敢詡衡平與鑑空

公布仁棣以月夕詩見示因觸閒愁卽步其韻

小橋人立釣魚磯十三歲時業師林志姜孝廉曾以明月小橋人釣魚題命作六韻詩驚起孤鴻月下飛時失偶經年矣破鏡憐卿情脈脈

脈悼亡詩已

積八十首穿窗近我思依依今秋至校有明月有情如識我穿窗近照讀書臺之句

晶球耀彩霜千里白壁銜輝柏十

圍埋香地離此不過三里一死一生月光同照

記得雲屏雙宿夜西樓斜照入鴛幃

夏閨詞

低鬟新出浴盆湯攜扇臨風北檻涼羅襪金詞紗半臂倚窗歸鳥數斜陽

游仙詩

玉宇輝澄夜四更羽衣迭奏鳳凰聲乘風萬里冷然善五色彤雲兩腋生
扶桑一瞬見輪紅滿眼蓬山不遠中洞府深沉天正曉開門小玉掃花宮
明妃從此住瓊臺塵世眉顰次第開祇恨白雲青鳥少琅函何日下天台
衆仙同日燕瑤姬鳳髓龍肝列鼎彝射覆藏鉤瓊液暖杜蘭香醉上鸞遲
閨闔晨開玉闕朝御爐香氣繞丹霄瑤池阿母陳封事謫滿花神返舊僚
天風吹下紫泥封催促朝衣迺露濃塵氣未深仙骨在新除城主掌芙蓉
天真爛漫宿根深日向壺中不易沉換骨金丹何用乞良宵月姊自常臨
踏青新月窈娘攜瑤草連天綠正齊那怕西池風露冷靈妃親賜辟寒犀

璇宮罷織可憐宵月下花前道侶邀末座叨陪秋水賦銀河洗眼正生潮
青天碧海幾黃昏羅襪凌波欲斷魂秋水爲神玉爲骨微風吹袂悄無言

題桃花扇傳奇

天子無愁士女愁名齊燕子媚香樓秦淮三百年來月又照毛嬙走兖州
半月鴛衾萬古情悲歡離合感侯嬴農家王謝堂前燕隻影烏衣夕照明
含情掩扇不勝愁一樣單栖淚雨流欲訪天台渺何處桃花空照夜臺幽
霎時風雨催花落死別生離分頃刻畫簾垂雨寂無人黃昏忍上棲鴛閣

悼亡

卅年鴛夢畫樓深破曉無端碎玉琴愁到小春愁愈甚菊花和雪萎牆陰
時自己卯九月下旬一日于歸至此共三十三年零享年五十歲自初秋始抱恙至小春朔天大雪病乃增重
內卒於壬子小春下旬四日卯

枕倚衾遮氣息微離魂莫共曉雲飛重泉好認重闌路太守園林柏四圍
而內則爲祖母之胞侄孫女是以內久有陪葬祖姑之囑爰從其志
先嚴以從侄入嗣太守公爲子

曉林驚散並棲鴻遺往猶留枕簟空苦憶華年人病起春風正好月當中
此予十九歲病起時詩中所作

之句

此別千秋更萬秋一宵紅燭古今愁曉風殘月雲陰重日爲傷心不照樓

莊周蝴蝶失雙栖姊妹花殘命轉齊一枕元方樓上夢離魂早化杜鵑啼

內妹夢亡兄歸對之咏詩句曰

杜鵑枝上月三更未葬年而內與妹先後下世

自恨青年乞巧詩無端感慨語離披果逢七夕歸來後獨對雙星淚眼窺

子年十八將婚適逢七夕師以

乞巧爲題予起四句詩曰乞巧年年事伊誰乞有靈依然逢七夕獨自看雙星詩識也

髻齡姻好訂重慈中表雙栖少別離此日驂鸞遣我後傷心竹馬遇卿時

廿年枉染桂枝香棺蓋空留七品妝朝市已移人半老銀河終古隔紅牆

芳因三結長生果手繫紅絲三十年不是短緣仍似夢夕陽西下奈何天

二八羞顏未肯開倚幃千喚不頭回今朝萬度呼無應了却溫家玉鏡臺

當年一掉返南都攜手燈前樂莫逾會囑功名休過望莫因文譽損身軀

歡娛讎語說同衾三十年緣魂可尋豈料片言成讖語卅三年籍籍如金

噩夢頻頻作旅人歸家祇認畫眞眞於今垂老仍依夢匯水樓遲失綰巾

少壯時予常夢外出及歸而內

已亡撫棺而已痛悔莫及今幸
近館匯上雖少待疾尙及遂終

重闌棄養痛何如自說精神減素居一夜西風椿樹倒昏晨慟絕繞牀餘
壬寅初冬先嚴棄養內慟過所生

從此中心敬姜敬淒涼泰水又重傷半兒聊盡些微禮孝意何能答孟光
於今又閱十年來階下孫枝七樹開皓首雙鴛仍並宿那知無語返瑤臺

內子既殯後至館漫題二絕於北樓

好輕擔負謝塵紅濁世因緣昨夜空小住名山過晚歲繩床茗椀北樓中
雁影孤飛不忍歸西城遙望正斜暉夜來布被寒尤甚自起挑燈補絮衣

二星期後又題五律一首

漢帝微時劍相如抱熟琴家貧元配重歲久愛情深缺月無圓日終天有恨心中年絲
竹感寫不盡哀音

前題七律

肅肅靈風冷畫堂淒淒繡帳捲匡床春雲冉冉游仙夢夜月沈沈碎壁光昔日蹉跎今

日悔近年疎略少年狂回思花好蟾圓景此恨誰知祇自傷

傷心一曲奏鈴淋落葉哀蟬淚不禁逋老思梅徒對鶴長卿歸蜀忽焚琴夢魂夜夜日輝路旅況年年匯水陰同穴有期知不遠蕭蕭兩鬢雪霜侵

堂階望月有感

時內子卒已二旬停殯中堂適逢望夜予休沐在家獨步庭階感而賦此

白頭人已缺皓月影仍團卿臥中堂靜吾行下砌看千霜凝瓦冷一被覆棺寒泣憶南樓下羅巾拭未乾

追悼

行跡蓮香冷妝痕粉盒殘舊環留翡翠空簾展琅玕窺檻月如夢登樓風滿欄羅裙長碧草想像臥林端

望月有感

此夕瑤臺月正圓飛瓊何事杳如煙屏寒翡翠三秋露瓦冷鴛鴦五夜天丹桂香濃前度夢玉簫情重再生緣畫眉窗下西沉處恨煞雞聲報曉先

悼菊

悼故室也故室年非盛歲而志行高潔正似晚年之孤芳今亡已十月矣而所夕追悼未衰爰借斯題以抒情懷豈敢云詩聊以代哭云爾

古梅書屋遺稿

淚滴東籬酒漫斟白衣相送聽寒砧枉稱壽客延齡并孤煞喬松覆徑陰傲骨倚風霜
太重落英如雨月初沉淡妝人往清標在踏破僧鞋夢裏尋

圍鬆金帶蟹螯枯三徑荒涼老圃孤冒雨花開渾似夢傲霜枝倒不堪扶神衰陶令生
生晚陶有自挽詩餐斷靈均負負呼簾捲西風空悵佇佇一作望醉楊妃可返魂無

追悼

簾逗疎涼夜色幽銀屏燈火憶東樓卅年塵夢三生債一夕歡娛萬古愁翠簾牀空霜
五夜紅心草長襪雙鉤自傷王謝堂前燕落照依依隻影留

閨房燈

金釭列盞桂堂東人影籠窗繡閣中煙幕羅帷迷楚夢光生寶鏡耀秦銅笑吹夜月雙
顏赤熱度春心一點紅記得昨宵停絳燭商量深淺黛眉工

仲秋八日重至北樓卽事

孤鴻又向北樓來蟲語聲中一卷開弦月有情如識我穿窗近照讀書臺
階前秋色雁來紅艷勝花枝立晚風越老羨君年越少精神莫道不如儂

秋夜與弟子賜伯夢臣士達鳳翔閒話

月影一簾薄蟲聲五夜喧園林饒白露燈火話黃昏夏屋鄰環地春桃晉代源清樽芳
菊釀文字又重論

菜傭煙水氣此地最文明簾捲夕陽墮門開弦月生蟲酣經籍味鶯和友朋聲欲賽江
郎筆吟階秋卉榮

蘆花

瑞雪隨風點客舟頽雲不共水東流半生飄泊單衣冷一白江湖萬里秋映月欲迷眠
鷺羽搖霜莫辨釣翁頭祇憐澤國飛難遠怎及楊花徧地遊

冬日

千林葉落鳥巢空廊下簾垂掩朔風終日南檐來曝背不須爐火擁冬烘
冬至日行過後園即景口占

臘梅香氣襲衣襟小步名園句獨尋雲漏斜曛天釀雪鳥聲如沸下空林

冬至日薄暮西樓望遠

西樓者徐匯公學之樓也登此而望
三里之遙東方偏南少許內臺在焉

老去心情萬事空西樓遙望墓門東書帷此夕霜千里麥隴他年酒一鍾流水落花人
逝後暮雲寒樹月明中飛瓊駕鶴歸來夜城郭樓臺已不同

時城郭已毀而予宅亦全行改建

丙子之亡將二月矣今選臘月既望葬於

先祖妣墓後左側詩以送之

重闢恩受到重泉芳魄還依大母前成隊白衣今遠送多情黃土後終圓淒淒霜露初
沉月颯颯松楓欲曉天卿若有靈應念我夜臺不是未算年

悼亡後適見稗史有名恨海者感傷其事因賦此律

精衛難將恨海填女媧無術補情天藥湯那及芳心苦華簪親移附體緣金石能開眞
宰泣井波不動待亡年因君一冊傷心史損我鰥魚一夜眠

悼亡

一場大夢卅餘年往事分明憶水魚紅樹祥光詩弟子春風圓月病相如銀燈低鐸雙
肩影窗日斜烘一紙書宛轉吟哦何句愛最相憐處舊妝梳

祥光滿樹紅內幼年學吟句也又誦妝樓摘艷詩最愛畢閨秀留別

淮陰道署詩中有舊梳妝處最相憐之句

無端風雪墮梅花恨煞梁鴻不在家
爪印樓欄來似玉身披彩帔去如霞
第三詎比青溪妹得偶頻餐古洞麻
彈絕素絲悲錦瑟玉溪絃斷悵年華

病來倚枕語深宵聽澈江城玉漏遙
扁鵲未邀悲藥誤虎頭雖好帶疴描
兒驚樓闕高明鬼魂出窗飛夢寐妖
幃角一燈青似豆黃昏微雨灑芭蕉

惆悵檀郎去匯濱難羈片刻及芳晨
夜歸緩步窺燈影病久常凝滿鏡塵
雙宿雙飛前度夢半痴半醉此時身
可憐四月逢初五鼙鼓漁陽送太真

唐李玉溪先生錦瑟一篇解人難索
或曰此悼亡也細味之誠然因依原韻
追和以悼內子

半載塵封錦瑟絃春風夜月憶華年
君臣藥配遺扁鵲姊妹花殘泣杜鵑
水母俗名海蟄內本瘰癧此物可
以化痰然久服無功竹瀝久服亦
無效故第三聯云云无石湘娥有淚竹生煙
巫山滄海經過處如夢如癡意惘然

玉溪先生更有以悼亡日近不忍赴宴一詩
今更步韻追和以悼吾妻

玉鏡臺前舊等行卅年身許事檀郎
歸餘白髮三千丈遺下寒衾一兩牀
平日笑言猶

可想病時情狀豈能忘在家出外俱難遣淚落心頭晝夜長

追悼

卅載低眉遵地道一生直意見天真陰陽界首分携處仙鬼叢中著此人雲鬢偏從雪
宵送春暉長在日暉濱震離六卦卿遺體呵護依然仗寶坤

溫郎玉鏡忽傾臺毛義承歡捧檄來同穴他年千古事壯心此後一齊灰阮咸姑母繁
華歇元相夫妻貧賤哀緣訂重慈恩義重尋常配偶豈能猜

此人爛漫盡天真夭壽剛中又轉輪公子褐裘思後世鬼仙降駕說前塵鴛衾宵冷檀
奴淚鶴背秋涼弄玉身平日秋容難彷彿祇描病色影堂新

內子葬畢回館漫題於北樓

千年芳魄杜鵑花幾樹棠梨宿暮鴉試向天文臺上望伊人宛在水之涯
前途咫尺接重謾月下依依話故園知否巖巖山在望歸寧午夜放魚軒

憶桐五古

一夕風雨狂墓門梧半拔儀樹本成雙東列將缺一閨人聞信起不暇加沐櫛曳裾坐

中堂傳呼報事郎速爲我支起餉汝錢一囊果然樹根大雨露沾浩浩老幹撐森森新
萌旁裊裊旁人問縣君一樹情何殷縣君目詩老不言惟有笑此意我獨曉今痛桐琴
槁碧梧冷月皎何日雙眠草

追悼用李玉溪哭劉黃韻

孤燈涼雨泣黃昏無效參苓入地冤布施畫裙全不賸淒涼羅襪忍重翻新衾夜暖疑
同宿病像晨看欲斷魂挾髓淪肌恩義重好從粥鼓守空門

前題用李玉溪馬嵬坡韻

謝家門第耀南州人自繁華卿自休祇見畫堂留病影何能海屋續添籌失羣此日孤
鴻雁乞巧當年詠女牛寂寞東廂魚鑰閉更無對榻說閒愁

前題用元微之鄂州寓館嚴澗宅韻

雙鶴同棲一老松別來清匯寄幽蹤巢傾雪壓啼孤羽宅拔雲開見六龍作客再欣卿
舍近歸家祇向影堂逢何時最是思君甚月暗樓窗半夜鐘

除夕漫題

一燈守除夜春氣暗中回
盆卉艷歐種案香餘臘梅
廬新先澤永竹爆客年催
解憶長安否諸孫學拜纔

甲寅年

元旦詠梅花

大地陽回見此葩
精神越向雪中加
冰壺濯濯湘妃魄
玉艷依依仙尉家
風送林香春遠近
月描窗影橫斜
百花頭上開何愧
子結猶教先百花

夜坐感懷

夜永如年恨轉深
孤幃獨坐影森森
飽嘗燕子空樓味
寒學蟲兒特地吟
四野寂無天籟響
一燈長照旅人心
那堪回首前塵事
東閣斜陽夢獨尋

東廂樓乃與故劍燕坐間吟處

卅年舊事那堪尋
小玉黃昏鋪夜衾
魚水豈知離恨邇
鸞鴦久絕夢魂臨
稻梁辛苦孤鴻唳
桑海推遷故劍沈
猶幸春風盈絳帳
未曾忘却老鴛鍼

新春令辰追思故劍

偶爾久歸甯猶嫌卿不情
況當人永訣倏已歲頻更
爆竹何喧闐孤燈獨醒清
花將開

陌上夢裏返雲英

大地春重返佳人去不歸
臨風惟暗淚鑒月更無幃
夜聽荒雞唱朝歌雄雉飛
玉鉤斜宿草三里望依稀

春草

極目天涯易斷魂
年年此際憶王孫
終朝細雨藍盈掬
一路東風綠到門
埋玉不教芳土見
踏青欲把繡鞵吞
小人有德憐香甚
擎起飛花襯碧痕

春夕悵望

明星幾點北樓前
澹澹銀河露滿天
想見一彎新月下
萬松深處玉人眠

讀南宋陸放翁先生七古仿其體作

放翁七十棄世間

放翁亡時有七絕示其子曰死去原知萬事空但悲不見九州同王師北定中原日家祭無忘告乃翁

猶望滅金收河山
豈知金

滅宋亦滅胡
元憑陵逞馳突
九十年來天道還
明祖驅胡出玉關
中原多爲胡人敗
黑龍江邊雲霧鬱
三百餘年胡運衰
武昌月起風雷馳
驅百日竟興漢
放翁九京莫長嘆

讀頌三先生近作卽贈

自愧關西作後昆承君青眼視鯁生長次兩公子從命學文藝三年教學芝蘭契辛亥壬寅癸丑同在匯學教授臥樓間隔二椽而已

十里絃歌雅頌聲君歸鄉里日與諸名士賦詩唱和爲樂滄海近邊亭放鶴奉實君在東海之西君宅在焉竹林深處谷遷鶯桃

花此際紅於錦庾信春園賦早成

元宵見月口占

一團瑞氣天空繞幾朵明霞屋角栖返照猶留鐘閣上月高已與萬松齊

蘭譜詞五古十八韻爲從女林和作女與閔行將碧森同學於務本女校氣誼相投將請結爲姊妹互交蘭譜將題四六駢文於譜上女乃請予代爲一

詩以答蔣

西南得朋慶至哉坤元亨務本朋來遠正在滬西城適符周易象自協吉安貞航航蔣同志蘭馨一室清書格熟衛氏經義傳伏生賦若才量斗詠絮言飛瓊璞也求學晚讀書未知名何幸與君遇風雨聽雞鳴異苔同岑意連枝同氣情下交蒙不棄許我稱弟兄人定勝天定鳳鴉協一聲今朝義相結車笠訂新盟心性永共勵憂樂常同縈五倫得占二同胞邁幾成曉櫛並臨鏡宵編偕對藥一室樂晨夕兩地見牆羹問情深幾許浦江波一泓千秋與萬歲不涸常盈盈

元宵漫題 前詩作於薄暮此詩成於半夜

雲銷萬里見青冥數點燈光數點星北閣夜深諸籟寂一方明月正中庭

舊蘭

小家碧玉正芳年素潔丰姿劇可憐一點額黃嬌不落亭亭倚竹畫闌前

折枝桃花 以桃花夫人作骨

細腰宮豈漢長門金屋緣何見淚痕只爲移根思故地胭脂淡點悄無言

玉兔花 白中微帶粉紅色其口則嫣紅

臉邊酒暈不勝嬌唇上脂痕豔未消幾朵碧雲扶淺醉玉清吹下廣寒霄
搗藥微聞玉杵聲仙家三窟在蓬瀛人間花月春江夜莫向胭脂井畔生

春日北樓卽事

康成泥婢捧詩筒絳帳風香醉馬融滿座春光看不盡先生常在百花中

春夜瞥見新月有懷埋玉

花隨逝水夢隨雲春草蒙茸罨畫裙贏得玉環羅襪在一鉤新月照新墳

詩弟子沈公布臥東暨其友夜酌吟詩以予詩句一方明月正中庭爲起句各成

七律一首詩成後數日出以示予適有心中事寐而復起乃和其韻自述悲懷

一方明月正中庭大夢何年我得醒高閣孤燈宵影黑新坟三里夜燐青單衾冷枕長
愁況圓魄虛絃幾度輕身是北樓關盼盼曉霜獨坐下簾丁

爲詩弟子沈公布題帳顏贈沈潤夫新婚

七襄此日報成章女姓袖裏支機贈沈郎帳顏上彩筆雙枝畫眉好吐絨忍笑貼鴛鴦畫

貼絨上有鴛鴦一對

金帶圍開畫有牡丹二朵富貴長休文新謁女元章玉蘭花發紅羅帳畫有玉蘭二株低首春風拜并

王

爲宗達明題畫贈沈潤夫新婚

圯上受書圖

逐鹿紛紛正發蹤匆匆黃石圯橋逢素書兩卷留爲贈好定乾坤訪赤松

種杏成林圖

緩度溪橋春水生杏林風軟語流鶯丹成九轉葫蘆貯從此佳人識大名

得魚沽酒圖

得魚此日莫忘筌酒國長春別有天鄉近溫柔誠可老玉壺買醉自年年

桐陰清話圖

碧梧澣淨鳳凰枝芳草如茵緩步時纔罷畫眉窗下筆又攜良友共談詩

不忘七律四首追步天南遜叟韻有序

天南遜叟初娶姑蘇楊氏夢蘅四年而亡乃賦不忘四律以悼之

另有悲秋曲長歌仿香山長恨

歌體前蹤後跡敘事甚明

余琴絃斷絕一載有餘矣偶誦叟詩悲情悵觸正同病之相憐爰追

和四首以悼故劍蓋各有傷心即各有所極不忘者在也詩曰

難話因緣短與修卅年東閣記勾留

內在于室前後計三十三
年一月零三日不計閏

香濃被底人歸夜涼滿樓心

簾滑秋長恨月無全夕期多情天付暮年愁此身已足爲卿累縱有他生遇願休

秋江臥病月黃昏一點殘燈獨掩門病到沉時翻望起淚因悲極反無痕枕留甄后傷

遺物襪檢楊妃記舊恩鶯語分明聞昨夜知卿死不斷情根

此日塵緣縱早空當年繫足聽蒼穹

內爲先祖妣之侄孫女幼訂鴛盟俗謂天婚蓋不用術者合婚權由兩姓長者自主也

艷情五夜樓頭

月爪印三生塞上鴻

內十七子歸盛服登樓手按扶梯錦繡長袖半露金盞耀目蓋大家閨秀不操井臼往往養長指甲也迨至予家後閱歲半而生男前後十四年內連舉六男日夕哺乳

勞苦異常指甲無存矣

歲歲苦辛腓字裏年年顛倒夢魂中綿綿遺恨終天壤悔煞連番賦惱公

追悼詞成已百篇東樓回首尙淒然微之經海難爲水陶令虛琴不上絃渺渺昭陵勞我望剛剛錦瑟是卿年珊珊瘦骨儂仍在不料乘鸞爾竟先

楊柳風

楊柳本多搖曳態迎風更覺可憐生東西拂總無成見大小垂難識舞名被動腰肢張靜婉留仙裙帶趙飛卿祇嗟吹向天涯去三月狂花撲滿城

梧桐月

無端秋色到梧桐皓月今宵一片融高士澹餘蟾兔皎嫦娥窺處鳳鸞空水晶簾外枝猶綠蟋蟀聲中燈不紅欲把心孤向天訴廣寒曾記躡西風

芭蕉雨

颯颯蕭蕭響不停芭蕉一夜雨冥冥簾前打碎春心捲窗裏驚回夕夢醒潤澤琴書天

更綠淋漓翰墨紙添青瑤階沾足恩何限好展新陰護尺牖

新秋小恙初減恰值校中開課夕間月明如晝南窗納涼口占一絕

老懷眞似怕風燭溼病惟憂悶雨天今夜中庭明月滿獨看二十二回圓

北樓秋雨時正白露節林葉尙未落連夕風潮挾雨晨起賦此

東南半壁樹如屏葉葉籠煙罩雨青林外千絲忙似織雲中萬點密於星花多拜竹蒿
庭中雞冠花因雨向老少年拜倒 根忽生梯楊柳靈新種墓松長幾許黃門望眼在疎櫺

北樓悵望

明星幾點北樓前澹澹銀河露滿天想見一彎新月下萬松深處玉人眠

雨夜不寐起坐窗前漫題一律

天際濃雲任往還奈教床側漏潺潺樓燈隔雨黯秋色鄰樹搖風疑夜山浣淨脂痕海

棠色平添紅意雁來顏會當龍口狂噴水洗淨干戈渤海灣
時東兵欲攻青島從龍口登陸而膠州青島一帶又以多雨積水成

潦故收句云云

白露節後七日晚步後園胸中有感因賦一律

容易年時兩鬢華蒼茫獨立望晴霞一天晚景初黃葉徧地秋光小白花鳴咽寒蟬悲
老境英雄蟋蟀鬪鄰家夜來搖曳風前燭猶仗晶簾一角遮

月夜獨坐

獨坐北樓月騷人夜未眠圓仍如玉鏡明可澈黃泉雙照懷前夢單栖剩幾年何當松
柏下小步訪嬋娟

題花乾

從來駿骨價千金況復前緣伴我吟記得當年嬌且好肯教輕易擲牆陰

秋晚卽事

晚鐘一杵度虛空破鏡當頭月半弓病起晶窗秋欲暮海棠如淚滴階紅

孤雁爲王氏文君作并以自傷

嘹唳孤飛雁翱翔夜正中魚勞魴尾赤淚血杜鵑紅蘆荻愁邊影關山雪裏風那堪同
首處雙宿粉垣東

詩弟子沈公布贈菊一盆極豐肥如楊家環感觸賦此

前年秋菊萎牆陰予悼亡句曰愁到小春愁
愈甚菊花和雪萎牆陰舊夢如煙不可尋忽訝太真魂竟返春風圓月

玉樓心此菊名玉樓春予舊句
云春風正好月當中

憶舊

密意幽情衆不知小樓靜對麗人詞推窗酌酒看明月三五將圓未滿時
一鞭斜照興何賒樓角臨歧絕色花記得鳳雲呼小字黃昏月皎正琵琶
無意風波受抵攔秋宵半臂竹青寒何如窟裏天香擁花滿瑤街月滿鞍

記得

記得當年小玉狂東窗自剪掃晴娘鋪衾戲詠微之句薄怒佯嗔取次嘗
今日前歡墜渺茫侍兒老去玉人亡謝庭再遇青衣日可憶柔藍帕子香

回首

青年回首昨宵如中道匆匆憶水魚未娶情懷同未嫁鰥居况味等嫠居三生有石精
魂在五十無絃錦瑟虛蟾不常圓花易落夢中風月記乘除

康蘭生初放矣獨對摯愛之名花轉憶已亡之故劍未免有情誰能遣此率成一

律自解愁懷

道蘊清姿出大家肌膚似雪潤無瑕溶溶毓國梨花面窄窄潘妃玉笋韡香澤幾番聞
枕上夢魂二載隔天涯今宵一朵康蘭放憶煞芬芳挹鬢鴉

雜詠

友朋該師弟附入五倫屬人生難知己幸遇一人足嗟予夙嗜詩世少知心腹章君光
照才唱和數篇幅飢驅入闥闥風雅束高閣觥觥童汝福才華何郁郁清吟僅一秋白
圭無三復中晚深感情吟哦當絲竹靈性有誰知自分永冥漠

有兒青一衿淺句亦能續祇爲謀饗殮不遑吟卷軸其餘諸所生知予詩愛讀那知老
人吟咳唾生珠玉誰料見吾弟絳帳光輝燭草草芻蕘情得君顯幽獨此中有天緣文
字關鍾毓天賦靈必顯故令逢高躅傳人斷章句功勝掩枯骼知詩開心情誼勝親骨
肉平生忠厚名無用稱碌碌得弟一稱揚無憾可瞑目

乙卯年

仲春上浣細雨連朝因賦一絕

淺白深紅繞短籬。涼秋應近雁來期。濛濛細雨輕如霧。正是移花接木時。

漫題

海闊波如掌。天空鳥入雲。不留餘滓在。惟覺妙香聞。竹露隔林滴。松風一枕分。悠然忘世俗。不管日斜曛。

月試校生校閱初畢戲賦二絕

不作朱衣下絳帷。連宵辛苦弄毛錐。羊燈照澈如冰鑑。一樣衡平不用私。

北閣四年羈旅夢。南軒雙管貶褒辭。高歌蜀道難纔罷。苦憶吾家舊玉妃。時悼亡已三年矣。此次正場以

鄒艾偷度陰平爲題

放歌行

情若百千萬億春蠶絲。網盡千秋萬歲英雄成。支離情如瘋癆癡。隔病人髮亂到千根。萬縷蓬勃如帚刷。抽刀斷水水更流。拔刀斬情情不留。痴情如水苦海濤。汨汨烈意如刀出鞘。風颼颼。刀不破。蠶絲網不是老髯虬。藥不起大症病。不是河間劉。從今後海闊天空。我身非我。水冷金寒大了休。

詠康蘭生花

亭亭倚竹好風光艷奪芙蓉更久長絕似雲鬟雙宿夜夢迴鴛枕暗聞香

北樓庭前雜植秋花三十餘本戲題一詩

金鳳亭亭立檻前斷紅雙臉綠披肩雄冠劍佩來相聘媒妁應求老少年

去秋公校園中小白花開如雪故余詩有徧地秋光小白花之句今夏主人清除

園林拔去花樹甚多小白花亦遭發掘存者不及小半詩以悼之並悼諸名花

花開一夜白如雲去歲秋心只寄君今日道旁多委棄匆匆發掘似荒墳

桃穠夾竹賽春光月映紅薇秋夜長一例今朝作薪去焦桐誰奪蔡中郎

詠庭前老少年

丹黃相間耀秋妍百歲千秋是少年應是天孫蕊砧遇歸來織錦倍新鮮

丙辰年

北樓漫題 花朝之夕題於北樓時五兒已亡七日矣

一瓶梅影一窗燈夜冷霜淒月乍升獨坐北樓思往事鐘聲敲碎夢如冰

無題

不夢情天不惹魔一條清匯卽銀河馬嵬艷跡留纖襪魚服金枝入網羅

此指虢國人似瓊

瑤原不固淚侔珠顆更形多那堪東院沈沈夜紅燭三更照逝波

前塵一去渺無痕不語無雙竟斷魂鏡檻吟餘悲錦瑟稠桑道遠比崑崙燕泥零落簾

垂地魚鱗萎蕤晝掩門環佩未來花盡落滿階桐影月黃昏

星河屋角漏聲長一夕相思兩渺茫九子連環成底事卅年識語費評量填橋朱雀辭

銀漢舊巷烏衣鎖夕陽袖裏分明雙帕在白頭青鳥記銜將

今朝結果昔年因莽莽乾坤草草身自古有情多感慨從來入世總艱辛神仙眷屬雙

文遠圖畫嬋娟百日眞燭跋深宵人獨坐下帷忍看海棠春

舊日青衣馮小憐琵琶一曲鬧鄰船萬方奔走氤氲使極目歡娛伉儷仙憔悴蕭郎成

陌路嬋媛故主臥林泉可曾回憶珠簾底侍立雲鬟理鏡前

故劍之亡於今三年半矣追悼之情尙未能已爰賦二絕

星河耿耿漏絲絲天上人間兩渺然最是不堪回首處一場春夢卅三年

咫尺松篁萬里遙水晶簾下度昏朝怕看楊柳樓頭月圓到東南第幾梢

六月中旬八日墳丁曹俞之女有疾來求往診遂拜謁吾 祖朝議公園陵並揖

我孝廉夫人松楸因誌以三絕

太守名園萬樹松墓門東道有新封蕭娘死尙重闌侍藉草今朝拜玉容

一溪新漲活通潮芳草黏天綠意饒纔隔行程三四里蓬山萬疊等迢遙

四載絃聲絕素琴夢中猶聽舊時音那堪王謝堂前事姊妹花殘恨不禁

六月二十七日晨登匯水樓適逢漁人嫁其失恃幼女爲同業待年婦一時在樓

相送者相送者介紹其間者咸後先而集余視其女面如滿月爛熳天真當有

後福爰賦一詩以贈其行

志和泛宅船爲家一樣生涯江上賒鼓枻蘆中呼小玉問年三五月光華團團人面圓
如鏡阿娘仙去何人領盈盈許嫁與漁童從此溪上雙雙影相士風塵我目眞蓬身異
日出將軍生子倫如李亞子今朝卽嫁孫烏程不然何以歸日天遣文星作送賓

織女渡河後四夕黃昏時分闌上匯濱茶樓眺望口占一絕句

匯水樓頭月正高黃昏倚檻露盈袍螢光不敢妬娥競繞電燈飛撲幾遭

七月望夜不寐因起看月口占二截句

連夕無雲夜氣清庭花環砌候蟲鳴晶窗早汲清泉浣要看秋宵月色明
露濃煙重鳳仙開紅入秋心候雁來一角東南樹如嶂蟾輝照隙見樓臺

雁來紅歌

卽老年余喜其名絳帷前後多植此
草野老見之都云此野莧也戲作斯歌

梧桐月碎秋心起窗幕垂紅海棠麗亭亭金鳳亞欄前翹首胡雲雁書寄江東小草未
知名一叢五彩兩砌呈靜似錦毯鋪淨土動疑繡帔着仙人齊東野老紛紛說明是米
顛蔬圃物何爲倏變日光華或者拜靈點首石萬此靈芝草數莖仙乎仙乎等堯莢白
頭子雲笑勿休少見多怪莫啁啾寄人籬下雖堪歎文采風流迴不侔天邊請看歸鴻
度點畫朝朝又暮暮丹黃揮洒一枝毫撐天蓋地橫今古洗筆池泉溥漑沾春風時雨
匯溪南西成萬里黃雲擁絳帳花紅錦上添

爲詩弟子沈公布題國恥圖

圖中有堯莢樹一株一翁手
指旭日令童子掃除污點

十圍荆棘罩蒼苔莫遣銅駝此地來一帶階前且勤掃雙眸日下恐難開舉頭斯際長

安遠濯足他年蓬島回爲國馳驅少年事好清雲霧滌塵埃

題袁前總統肖像

蒼黃末路嗟無計丹詔南陽起臥龍還我漢家乾淨土不須痛恨罵奸雄

秋夜聞蟲和詩弟子陳若虛原韻

書幌燈如豆蟲聲四壁秋桐階風力定籬落月光幽催醒三更夢平添一夕愁啾啾如訴苦可爲禦冬憂

題聶將軍士成墓 七律

宣州城外冷烟籠古柏森森起朔風百戰英雄埋駿骨一村蘆荻伴哀鴻腹開弘演風雷泣胯認淮陰日月忠想像魯陽酣鬪日落霞夕照血光紅

前題 七古

聶將軍真英豪神颯爽膚不撓珊瑚赤嵌胄蜀錦紅戰袍腰掛拄頤陸盧劍手執雪亮指揮刀坐下千里馬馳騁噴波濤一聲鼓聲響千軍萬馬皆怒號烏龍江南遼水北揚威大獵馳百遭山川扼塞羅胸腑倏然扶桑起雲霧摩天嶺下東兵來節節淮軍盡摧

挫惟有將軍如虎貔奪返連山關一座事平畿輔作提軍萬五熊羆鎖北門儒將風流
方緩帶妖魔晝出又紅巾不用人偏用鬼上相剛剛壇下拜大師兄二師兄端端跨馬
出深宮親藩附虎虎添翼將軍一怒不可抑五更拜表請勦三翻遭紈袴王公斥從斯
匪勢決江河將軍幾難保室挈不顧全家惟顧國此心金石肯消磨屠龍小試楊村捷
日出羣欣颺颺滅那知誤國有權奸終始揚塵使烟集轡軒代君臨神聖孰敢侵一朝
匪圍郝經館列強大震兵宵徵豐隆鉅炮雷霆震合軍四萬拯使星津沽炮壘如山倒
壘中戰血半尺腥不見拳匪施神術但見碧眼隆準來西兵城狐社鼠抱首竄京津道
上不見一人行異哉前途槍棘林尙有漢幟隨風飄入雲將軍豈是臧三耳何敢獨力
揮戈保帝城將軍發令整六師鼙鼓喧旌羽檄馳角聲鳴咽進無退走石飛沙鏖戰時
坤輿欲翻蛟螭鬪鉛丸亂舞聲噴噴前臨敵後驅匪短兵相接血淋漓前者仆後者繼
金石爲震神爲哀猛獸驚逃草木駭風雲變色江海移炮火通紅夜不黑朔風獵獵揚
旌旗忽然陰霾沉沉日月暗碧血殷殷天地悲將軍忠過衛弘演不納君肝腹亦裂將
軍勇過漢淮陰身非勝夫勝亦絕將軍馬革一裹尸後軍大潰如河決楊村有壘皆棄

奔鳳輿從此西巡決求成上相粵東圖說及將軍淚沾臆淮軍舊部有幾人光明正大
將軍及勦匪禦敵兩盡道肅清直隸微臣職不能隻手挽狂瀾願死沙場甘似蜜妖氛
消散星河明玉帛重敦罷戰征哀哀將軍梅鶴至殘肢迎葬此園陵吾來墓上剛冬季
北風吹雪山如睡四圍植物盡凋零惟見長松猶帶翠撫樹低徊神慘傷大荒俯仰悲
思長莽莽神州俎上肉安得猛士來保疆嶽嶽將軍今已矣空思十萬橫磨劍鋒利惟
有宣州城外土一坏年年寒鴉古木斜陽裏

丁巳年

春前漫興 時方新正

天與名花續斷絃移來城北倍鮮妍墨池水活水初泮絳帳風和月正圓三徑鶴鳴催
子和半牀梅影伴妻眠佇看對食蒙莊叟六十新開並蒂蓮

感懷 正月二十五日黎明作

窗外樓高遠接天白雲深處雨如煙知君幾日禪心靜坐對青松證冷緣
當年一夢入繁華小小神仙富貴家今日門前餘四柳繩牀茗椀了生涯

病中作 仲春二十四日三鼓作於北樓

熱血腔中少維摩興欲闌
既寒興夏屋伴病有春蘭
缺月窺晶格斜曛戀畫欄
電燈明不絕朗照舊詩壇

詩餘

憶少年 調寄御街行

銀河依舊紅牆外檻徙倚情無賴
明燈題句壁生塵惆悵詞謳幾載劇憐良夜攤詩對
月獨醉紗窗畔一朝待闕開駕社桐夏澣衣春賽新涼沁體綺羅飛
又歷重陽夢寐
嫋嫋來後鷓鴣並處纔了相思債

鰥緒調寄浣溪沙用西青散記雙卿韻

斷藕心情泣素絲落花意緒哭殘枝
小樓春暮獨眠時溫嶠玉臺傾太早
嫦娥仙藥乞嫌遲
夜長誰暖瘦腰肢

前題 調寄望江南同上

年時夢常在
匯橋西宛轉雙飛看粉蝶晨昏百轉聽黃鸝
春事忍重提圖畫裏省識

是還非寂寂無聲塵滿鏡眞眞不下淚盈衣朧月照窗低

題亡室遺照調寄溼羅衣同上

世緣雖斷尙牽情看郎病眼如生甚日同君雙雙倚屏
獨坐深更莫驚影亭亭伊人
宛在呼之欲出紙上卿卿

前題調寄鳳凰臺上憶吹簫同上

之子于歸文人豔福卅年曾受會消奈育雛故壘風雨漂搖小別巫峯十二清匯水碧
漢迢迢歸來夜星期駕鵲莫負良宵 蹤遙世無扁鵲搗藥乞長生病轉無聊看斷紅
上臉返照偏嬌一室淒淒慘慘周昉筆對枕空描忍還看明璫翠羽獨坐朝朝

雙番入夢調寄琵琶仙

風雨沈沈如年夜入夢伊人宛在依楊纖小腰肢略同扇香墜低鬟臉常容悴服詎因
病悉消豐態燕燕樓邊鶯鶯廂底勿遽逢再 莫非是三里銀潢輕颺送芳魂到孤館
底事譚肩無語又依娘婉婉隅坐若離如接意似道清恙得初退曩昔凡骨環肥幸金
丹換

前題 調寄 鳳凰臺上憶吹簫

紅豆青燈黃泉碧落幽明一樣相思悼卅年故劍恐我難支舊館新阡密邇通一水清
匯墳溪乘風渡冷然善也銀漢佳期 凌波露涼獨步歸路恐迷途膽怯幽閨乞阿娘
相伴嬌客同窺怎奈嫺緣早滿檀奴見態轉矜持垂頭處依依不語渾似初筭

北樓雨夜 調寄 點絳脣

鎮夕無眠北樓獨對孤燈夜雨聲如瀉惆悵園花謝 窗外檐泉窗裏鐘兒擺無聊賴
披衣牀下追悼詞重寫

憶舊 調寄 念奴嬌

屏移雲母掩銀燈如煙斗帳低護自掣簾鉤金索響千縷波紋澹清簾疑冰可人似
玉閨漏沈沈墮樓心涼透良夜何忍辜負 怎奈逝水東流團圓玉鏡幾度當頭過草
草鶯花卅年載耳鬢雙星染素萬夕鴛鴦一宵杜宇啼血聲聲苦桂堂東畔淡朦朧月
籠戶

附錄少作

采蓮曲 五古十四歲作

十里池塘路花艷
籠芳霧蓮葉最深中
緩緩歌聲度一陣捲香風
陡見紅裳露
採蓮莫採葉有珠空自圓
採蓮莫採藕有絲最易纏
莫因蓮心苦遂將蓮子捐

記夢 五古

昨夜有何夢夢在山之陽
四圍皆綠水峻嶺在中央
乘舟浮綠水舟動水泱泱
攜展上高山天風入袖涼
山上有老松蕭蕭逸韻颺
江濤和松濤相接聲偏長
閒向石上坐濃陰如蓋張
吟成得佳句投詩開錦囊
天雞忽然唱流音滿四方
下界雞盡鳴覺來仍在牀
吁嗟乎人生原一夢碌碌爲誰忙
黑甜鄉最好吾願老是鄉

隱居樂 七律

松菊田園隱士心
結廬無有俗塵侵
只須老屋堪高臥
何慮名山未入深
一榻清風秋聽雨
半窗涼月夜鳴琴
此間自有無窮樂
且把新詩日朗吟

前題 五律

富貴原同夢山林羨隱居
晤歌聞邇室風雨此蓬廬
北牖拈新句南窗讀古書
悠然聊

自適碌碌比無如

無題七絕二首集唐人句

西樓望月幾回圓只是當時意惘然似惜紅顏鏡中老對人勻淚拾金鉤
樓上花枝笑獨眠爲言憔悴過年年洞房昨夜春風起病眼開時月正圓

春夢七絕

夢爲蝴蝶繞芳邨雙宿雙飛花底存借問誰家春夢好春來無夢不消魂

元宵後一日雨夜漫題七絕

蓬萊無處問前因十六年華夢裏身最是不堪春雨夜孤燈老屋一詩人

春日郊行卽景

芒屨竹杖步長隄桃李爭開古樹低吹笛牧童來曲徑問津漁父渡前溪深村門遠無
處吠小院花香有鳥啼秀色應知春野足得詩卽付負囊奚

游徐園七律二十四歲作

庭院春深處士家繁華世界見清華竹籬門亞桃花笑螭粉牆高薜荔遮游屐慣欺新

茁草夕陽留戀未開花夜歸何用籠銀燭明月街頭送晚車

古琴一首贈章君開文

予有一焦尾古韻滌塵襟何爲久不彈謂世無知音知音今已遇何敢負良琴流水高山外松風靜一林七絃流激越渾似長龍吟拂拭請君彈幽閒堪寫心

有患目以虱血治之者戲書一律以笑之

嗟爾禪中虱捫來血未乾東坡揩病目

東坡惠州見海棠詩嘆息無言揩病目

長吉嘔心肝有某婦見而大嘔吐用豈牛溲

並功同馬渤難夜明砂在否蝙蝠撲簷端

病起時二十六歲暮春病瘍入夏方愈起而賦此

容華鏡裏清於水腰腳風前軟似綿病起不知春去盡推窗庭樹綠成煙

示三弟紀石時二十七歲弟方從余讀書古梅書屋中

青衫落拓我依然幸慰襟懷有惠連椿樹承恩常庇蔭芸窗奮志結前緣藍田種玉類

成日

時四兒將生

滄海遺珠待貢年

時戊子新報罷

曾向茂材標異等着鞭肯讓祖生先

三年前丙戌歲試列一等

兼取古學

暑夜乘涼 五律

夜深人靜後最愛晚涼生
小扇裁蒲輭單衣試葛輕
窗開風乍入軒廣月初明
簾外荷花淨清香到處迎

乙酉南闈試畢歸次下驢待舟宿旅店口占

夜靜投茅店徘徊待去舟
窗窺遙嶺月門吸大江秋
屋小人聲雜燈昏客夢幽
明朝掛帆處直送水東流

過金焦東歸

歸輪飛似鳥薄暮出金焦
夕照峯頭寺江聲船底潮
涼風吹月上餘暑到船消
破曉前途間吳淞路不遙

無題 此詩爲解氏表妹而作

羅衫紈扇美人風一粒明珠識掌中
漫向口頭誇落雁却教眼底見驚鴻
豆生南國連枝碧水到西江濯錦紅
橘綠橙黃好時候畫堂簫管聽城東

春風無賴忽終風駭絕層樓一擲中
不是烏鴉嗔彩鳳祇傷白眼對驚鴻
情波江上平

年綠血淚心頭點點紅重到畫堂如燕子喃喃竟日宋牆東
嘻嘻白日起融風杞伯姬傷一燼中生作癡人憐隻雁死無全骨嘆孤鴻山經火燄蓮
逾赤裙化灰飛色不紅誰激西江來救爾無情逝水泣朝東

秋夜讀騷

秋夜最無聊長吟興未銷歌高壺欲缺愁湧酒難澆蘭佩濃香褪蓉裳舊製凋離騷纔
讀罷蟲響又深宵

題白玉蘭花

古梅書屋予幼時讀書處也庭有玉蘭一樹百年之物高出牆表每清明前後花開如雪故賦之

花如白玉氣如蘭皓月臨時作雪看應有羣仙聯綺袂夜深人靜過闌干

古夢

七絕丙戌丁亥間童心田汪吟如趙鏡美楊東山諸君爲詩社初課以古字拈排題百箇予拈得此

何必邯鄲醒俗緣更無蝴蝶證飛仙此心自厭塵寰擾不到羲皇夢不圓

夕月

五絕次課又拈月字排題百個予拈得此

天香縈委珮湛露溼宮衣萬點紅燈影鑾輿夕月歸

跋

古霖書屋吟草一卷爲滬城名孝廉楊先生味吟遺著先生才華富瞻殫見洽聞羣經諸子靡所不通門下諸高足立程庭雪問侯芭字者歲恆百十計不幸天不假年於今歲暮春以疾遽捐館舍其詩弟子沈君公布金君賜伯沈君臥東慨想音徽擬存手澤特襄助其公子輩搜檢遺篋網羅散佚得吟稿二百數十首行將付梓以垂紀念蓋先生課餘得暇每喜吟風弄月以資消遣加以近賦悼亡老懷抑鬱困頓無聊之氣愈不能不寄於諸詩以稍發洩故集中尤多蒙莊鼓盆奉倩傷神之作蓋天下惟至性至情中迺有真學問詩雖小道頗足以覘先生之爲人也哀集既竟公布出示 銓屬 銓一言跋其後 銓與匯學闊別逾二十稔矣茲者舊地重遊適承先生後濫竽講席而卸裝甫三日卽得先生噩耗 銓與先生非特未獲有生平樽酒之雅卽廬山真面并未一識以漠不相知之人從而揄揚盛德稱述緣絲不將貽扣槃捫燭之誚乎旣而自維 銓今所處之室卽先生臥起之室也所用之書皆先生丹鉛之書也日與周旋之諸學友悉先生頻年來辛苦殷勤栽成樂育之舊弟子也佛說因緣士崇先德則從諸君子後思

有以表彰令名慰先生在天之靈者或亦不忘先烈而毋負此因緣也歟抑銓更有進者昔歐陽永叔謂詩人少達而多窮人多以先生暮年遭蹇志鬱不伸集中夥懷惻哀思語遂疑其處境彌窮而詩彌工不知先生世稱望族早折桂枝簪作等身藝林噪譽膝下鳳毛又多紹箕裘肯堂構世其家學以此言窮似曰未可況夫人生富貴轉瞬皆虛惟此神靈始終不昧先生幸在匯學迺得慈航指渡道岸誕登上叩九閭在帝左右吾知其身後榮福暨所以庇蔭後昆者正什伯倍於生前而未已也茫茫苦海擾擾塵寰得能如先生者曾有幾人是則先生之爲先生更有其不朽之事業在此區區紀念品曷足以概先生萬一哉用誌數言藉昭欽仰

歲在疆圉大荒落孟夏之月華亭吳廷銓伯衡甫謹跋於匯學之北樓

92

25

(